

ChL 9117.1148C

75

CHINESE-JAPANESE COLLECTION
HARVARD COLLEGE LIBRARY

~~74~~ FROM HARVARD-YENCHING INSTITUTE

OCT 11 1962



蜀道驛程記序

哈佛大學漢和
圖書館珍藏印

自昔揚一益二并稱天府按古者虞十有二州夏
九州揚州之域盡于南海五嶺之地所暨遠矣至
漢始別置交州部而梁州據華山之陽西距黑水
以今日輿地考之漢中興安屬秦則雍州南境也
鄭房屬楚則荊州西北境也所統不及揚什一而
揚益甲乙相次亡軒輊者則其山川之奇人物之
美物產材用之饒蓋可知矣漢唐已來志于常氏
賦于左氏傳于陳氏勾氏記于譙氏韋氏圖于宋
氏詩于杜氏堂哉皇哉後有作者可以橐筆而退

矣至述征之作則韋莊李用和輩不甚著于世而
陸游之書獨傳予以康熙壬子有成都之役往來
五閱月賦詩三百餘篇世多有其本又所記驛程
二卷置篋中漫不省錄忽忽二十年往矣屬門人
盛御史符升為予刻粵行三志因憶前事從蛛絲
鼠齧之餘譯而存之其間考古述今亦有足觀者
不忍棄也蓋蜀自獻賊之亂城廓為墟井邑非故
自李王孟明以來割據代有而文物掃地極于今
日雖以

盛朝休養生聚迄五十年而未能復其故也陸氏
之記記其盛予之記記其衰後有攬者參互考之
可以觀世變云康熙辛未冬長至日
經筵講官兵部右侍郎前都察院協理院事左副
都御史濟南王士禎序

蜀道驛程記卷上

哈佛大學漢和
圖書館珍藏印

濟南王士禎貽上甫

康熙十一年六月士禎奉

命偕鄭工部次公日奎江西貴溪人順治己亥進士典蜀試二十二日

陞辭七月朔與家兄西樵考功及家人別余方有

兒渾之痛伏枕浹旬屢勉就道留家累京師

依兄以居途次聞宋荔裳琬觀察尚在余後

荔裳新補蜀臬前五日行去歲荔裳及曹顧

菴爾堪學士施愚山閩章少叅沈繹堂奎侍

講程湟榛可則職方李容齋天馥陳說巖廷

敬二學士與予兄弟在都下爲文字之飲酬唱最多既而愚山遊嵩少顧菴歸禾中惶憐使并州繹堂再被召入翰林荔裳與余又將先後入蜀存歿聚散之間不勝感槩雨抵良鄉縣

初二日夜雨晨霽夾道青林蕭條上不見日北望大防諸山如彈冠振衣午次涿州渡涿水列仙傳琴高乘赤鯉于此暮抵松林店

初三日過定興縣暮抵安肅縣縣令梁舟三原人舊共事廣陵屬寄家書于京師

初四日午次保定府治清苑縣西郭謁椒山先生祠又謁忠烈祠甲申之難流賊破故關攻保定同知邵宗玄及郡人光祿少卿張羅彥兄弟御史金毓峒輩守死弗去督師大學士李建泰賺城入之爲賊內應城遂陷宗玄等皆死之近同知常大忠建祠祀焉抵陘陽驛宿是日暑甚

初五日過慶都縣古望都暮抵定州州北十里渡唐水水與滹水合流山海經云高是之山滹水出焉水經注云滹水東逕左人城南應

劭曰中人城西北四十里或謂之爲唐水也
水出中山城北即中阜下又有盧奴窮魚水
自涿州西南行三四百里無山渡唐水望見
西北一峯突起舟人云曲陽之嘉山也即郭
李破史思明處定自唐宋以來爲雄鎮兵燹
之後百不一存覓韓忠獻公閱古堂衆春園
舊址不可得惟蘇文忠公書杜牧之得州荒
僻中更值連江雨一篇石刻尚在按此詩乃
牧之刺黃州作坡曾謫黃後帥定武吏書之
耳杜刺池刺黃後乞湖州未嘗爲定州誌誤

也

初六日次新樂縣古鮮虞侯國春秋晉荀吳伐
鮮虞即此抵伏城驛元侍郎蘇天爵春風亭
在驛南蘇村是夕雨

初七日晨雨止午次真定府治真定縣唐成德
軍也城南渡滹沱西山爽氣漸來親人捫獲
鹿縣獲鹿彈丸山郭羣峰環抱金元好問北
渡後居此

初八日出獲鹿西郭有山自南來石骨刻露清
流浸趾曰西屏山入土門口巖郭蜿蜒相屬

坡詩所謂谿砮土門口突兀太行頂者也問
土人惟能指目抱犢即史記
卓山海螺數峰餘多不
知名午次井陘縣太行八陘之第五陘也縣
水一名阜漿自平定來入滹沱濁流奔浪聲
動厓谷井陘西南二十里龍窩寺石壁對峙
壁上小松一株生石罅徑尺許都城盧師山
石壁有小松與此正相類暮抵胡桃園夜雨
初九日冒雨騎行自胡桃園至井陘舊關十餘
里間石壁最奇角圭廉利下無寸土山中人
耕石田如浮圖層級然及關下峰迴徑斷呀

然中開忽見戎樓雉堞冠山而出登樓小憩
觀諸山出雲濃綠蒼鬱飛瀑淙潺爭流競響
冒雨出關危棧臨溪延緣錯互午過栢井驛
有栢井故城唐長慶初裴晉公為鎮州招討
使駐兵承天軍即此抵平定州入山西界州
有上下二城金趙尚書秉文守此州建湧雲
樓元好問詩云莫笑吾州如斗大他州誰有
湧雲樓夜大雨

初十日夜雨夢兒渾髣髴如平生是日為兒五
七枕上收淚成一詩是日山溜暴漲自旦至

暮凡三十餘渡輿馬甚苦揭厲抵芹泉驛芹
泉水一名桃川水又名桃江發源壽陽太平

谷流入縣水

此別一縣水非介休縣水也

十一日晨次壽陽縣使院中有韓文公使成德
絕句元祐癸酉左宣義郎知縣事孟天常子
履重刻公詩以團字為韻和作詩版甚眾大
抵牽率惟鄆陵陳棊文岡三詩合作壽陽在
春秋為馬首城韓趙魏共滅祁氏以韓因為
馬首大夫晉劉琨破劉曜于此抵什貼鎮宿
十二日晨食鳴謙驛榆次縣境春秋昭八年晉

侯築虎祁之宮有石言晉之魏榆即此暮抵
徐溝縣有同戈村唐高祖起兵處

十三日雨午次祁縣春秋時晉大夫祁奚邑周
禮并州其川嘔葬注云祁葬又曰温洩之澤
即爾雅九藪之昭餘祁也東南連峰疊巘縣
亘百里最奇秀者麓臺山山海經龍首山西
三百里曰麓臺暮抵平遙縣隸汾州府古陶
地帝堯初封漢曰平陶後魏避太武諱改今
名

十四日早涼發平遙三十五里憇張蘭鎮鎮為

商賈輻輳之地有類巖邑西河人好貨殖有
白圭遺風圭之言曰知不足與權變勇不足
以決斷彊不能有所守雖欲學吾術終不告
之矣夫烏氏倮得與朝請而寡婦清一女子
至抗禮萬乘此太史公所以發憤也抵介休
縣漢地理志曰界休表崧郡國志曰界休縣
有介山有縣上聚介子推廟又郭林宗墓在
縣東五里舊有蔡中郎碑子推祠側有文潞
公祠公縣人也志稱介休水利自潞公開三
河溉民田始是夕中元望奠渾沂兩兒

十五日立秋早涼介休西南二十里兩山夾立
汾水貫其中水經汾水又南過寇一作冠爵津酈

注曰在介休西南俗謂雀鼠谷入谷數十里
間道隘水左右悉結偏梁閣道汾流湍悍登
高臨深令人思垂堂之戒晡抵靈石縣隸平
陽府倚山枕河雉堞頽落不及平介間一聚
落靈石者志稱隋文帝幸太原于此獲一石
文曰大道永吉因置縣

十六日發靈石路犖确去汾水漸遠二十里登
韓侯嶺祠在山巔墓在祠後壁間詩版甚多

以沁水常倫為冠書亦有晉人風氣午次仁
義驛有韓苑洛先生小詞自跋云淮陰欲弔
興遲遲已有原忠壁上詩黃鶴樓前無李白
西風惆悵寫新詞頗有致友人董御史玉虬
文驥題韓侯祠句云春雨王孫草靈風古木
叢予最擊賞之可與常詩匹敵也暮抵霍州
自靈石西南盡日行崑崙間南望高峰入雲
即霍太山禹貢所謂岳陽也昔晉獻公滅霍
霍哀公奔齊晉國大旱卜曰霍太山為祟乃
使趙夙召霍君奉祀歲復穰自唐開元以來

國有大事望秩視五岳焉汾水過城西與彘
水合又曰彘縣周厲王流于彘者也

十七日發霍州午次趙城縣周穆王以封造父
按蜚廉有子二人惡來之後曰非子是為秦
嬴惡來弟季勝其後曰造父為穆王御平徐
偃之亂賜以趙城為趙氏哺抵洪洞縣郡國
志河東郡楊縣晉羊舌大夫叔向邑漢書楊
雄傳揚在沔汾之間周衰而揚氏或稱侯號
曰揚侯會晉六卿爭權偁揚侯揚侯述于楚
巫山按雄氏揚當是揚縣楊德祖言吾家子

雲王氏談錄嘗辯之縣有師曠里城外清泉
萬道彌望稻塍小憇道旁韓忠定公文園登
樓望九箕玉峰諸山煙姿出沒今人作印渚
間想薄暮次公至次公後予三日行及予於
此

十八日洪洞城南十里過臬陶祠墓午次平陽
府治臨汾縣古冀都也昭二十八年韓宣子
與趙魏共分祁氏羊舌氏之田以趙朝為平
陽大夫宣子卒子貞子徙居此姑射山在西
南山海經姑射之山無草木多水又南水行

三百里曰北姑射之山又南三百里曰南姑
射之山姑射有三未詳汾水經城西南入襄
陵縣界自是不復沿汾行暮抵趙曲鎮屬襄
陵

十九日過蒙城驛驛北有橋曰豫讓橋地在太
平曲沃界與趙城國土橋皆傳疑也暮抵隹
馬驛兩次公示見和介山懷古詩

二十日兩次公先行予後發人馬行山谷泥淖
中聞喜縣東北五十里雙碑對峙一為唐晉
國裴文忠公故里一為宋豐國趙忠簡公故

里文忠佐元和中興雖中遭讒間卒以功名
終忠簡志存恢復一忤權奸遠竄吉陽賚志
以歿悲夫午次董澤左氏文公六年蒐于董
澤晉太史蔡墨所稱颺叔安有裔子曰董父
擾蓄龍以事舜賜姓曰董氏曰秦龍封諸驪
川是也暮抵聞喜縣古曲沃史記昭侯元年
封成師于曲沃今曲沃縣乃古新田魏獻子
所謂新田土厚水深有汾澮以流其惡是也
漢書武帝元鼎六年將幸緄氏至左邑桐鄉
聞南越破以爲聞喜縣涑水在城南水經涑

水出河東聞喜縣東山黍葭谷酈注俗謂之
華谷至周陽與洮水合今城東二十里有周

陽城涑水在嘉隆前屢苦衝決先太師

諱象乾
字齊字

今此邑環城創築石堤一百六十餘丈迄今
百年邑無水患與史公載德李公復聘文公
作申公田喬公允升合祠俎豆不衰又有特
祠在東門予謁祠下父老子弟聚觀有泣下
者漢朱仲卿曰我故爲桐鄉吏其民愛我後
世子孫奉嘗我不如桐鄉民後葬桐鄉西郭
共爲起冢立祠歲時祠祭不絕此亦一桐鄉

也

二十一日雨午次弘芝鎮安邑縣境暮抵猗氏
縣注涑水又西逕猗氏縣故城非文公七年
晉敗秦于令狐闕駟曰令狐即猗氏也按猗
氏古郇伯國晉公子瑕撫其地又曰郇瑕春
秋晉謀去故絳大夫曰郇瑕地沃饒而近鹽
柳子厚所謂猗氏之鹽是也秦立郡縣以猗
頓所居改今名城中有莊武王廟祀唐馬燧
興元元年燧討李懷光駐此

二十二日次臨晉縣僖公十五年秦伯伐晉戰

于韓原築高壘以臨晉故各漢書以臨晉屬
左馮翊西南望中條山剌那之間俯仰萬態
唐末司空表聖避地居王官谷谷在中條春
秋秦伐晉取王官及郊者也暮抵蒲州古蒲
阪唐爲河中府又爲中都五代北宋皆爲重
鎮中條在城南十里青浮睥睨又有歷山媯
汭所出有英皇二女祠今吾鄉濟南亦有歷
山訛爲舜耕處有舜祠非是水經注稱剌始
寧二縣界亦有此訛矣濮陽亦有歷山雷澤
二十三日竝中條山行人家煙火與雲嵐相雜

柿林數十里菁葱彌望過首陽山山在中條
西南居雷首之陽故名首陽夷齊廟在其麓
至此坡陀益高下見黃河河南連山繇繇不
絕三峰峭拔迥出天外知是華岳也時見白
雲逢逢自山半出惝恍無定姿心目爲之清
曠至風陵渡渡河戴延之所謂風埽也對岸
即潼關入陝西界水經注云秦穆公帥師送
公子重耳涉自河曲黃河自龍門南下至潼
關折而東流故曰河曲也河水歷船司空與
渭水會即此地潼關古桃林塞秦立函谷關

漢武始廢函谷守潼關今關西一里有潼水
西征賦所謂遡黃巷以濟潼也昔哥舒一敗
而明皇幸蜀近孫司馬傳庭一敗而賊騎長
驅入關僭號明因以亡孫樵銘潼關甲云潼
關之甲完吾誰與安潼關之甲弊吾誰與濟
有慨其言今駐分守道一叅將一西安府撫
民同知一謁關西夫子墓石闕尚存地曰潼
亭晚抵華陰嶽鎮宿西嶽廟碑版甚多唐刻
僅存顏魯公紀遊數字適同鄉宋方伯艾石
可發自蜀臬遷粵轄相遇于此同宿萬壽閣

下略悉蜀道之難燈下作書寄家

二十四日昧爽登萬壽閣閣南與太華相對東
指河潼北眺涇渭西望終南雜樹蒼浮川原
繡錯閣上懸明高帝御製夢遊西岳文別艾
石冒雨行五里次華陰縣自潼關而西垂楊
夾衢稻香盈路頗忘行役之勞縣古陰晉地
三峰俯其前兵燹之後巷無居人惟嶽色不
改城郭人家在雲氣中過汾陽王里暮抵華
州州故鄭地武公爲周司徒隨平王東遷更
居新鄭此其故都也少華在州城南與太華

本一山何仲默所謂各望其地異名號者也
終南二華之陰泉流交錯出宜秔稻最稱沃
壤華之西溪多水竹菱芡相傳子美爲華州
司功曾遊之稱小曲江州人郭宗昌字眉伯
博雅好古文奇字著金石史時塾屋趙岫亦
撰石墨鑄華若干卷蓋呂與叔薛尚功一流
錢牧齋詩云關中汲古有二士郭髯趙岫俱
嗟峨

二十五日發華州月出少華之巔林風不絕行
十里始曙自遇仙橋至赤水橋浦樹山煙應

接不暇漁川江村諸原之水并流入渭所經
午次渭南縣縣南倚豐原北負渭水酒水自
石鼓山北流滙于城西注稱首水逕秦步高
宮東歷新豐原東北逕步壽宮又并入渭首
水即酒水也有白太傅寇萊公祠墓午次新
豐漢文帝令慎夫人鼓瑟指邯鄲道慷慨悲
懷處過鴻門坂有留侯舞陽侯廟暮抵臨潼
縣秦驪邑漢陰盤櫟陽地驪山負西城華清
宮在山北麓宋改為靈泉觀雍大記云溫泉
在臨潼縣南一百五十步泉凡三泓自山麓

琮錚而下至城西門散落溪谷流為潼水傳
稱宮中自供奉二湯外更有湯十六所甃以
文瑤密石中央有玉蓮花捧湯又以沈香木
為山錦繡為鳧雁明皇時泛釵鏤小舟嬉遊
焉時松聲滿山流水東逝唐人云繡嶺宮前
鶴髮翁猶唱開元太平曲俯仰盛衰之際為
之惘然泉上宋元以來詩版甚多有蔡京書
朝元閣三大字按圖經朝元閣在老君殿北
當踞山巔閣廢故置諸此山上有羯鼓斜陽
吹笛之樓明珠南箏長生之殿及鬪雞舞馬

飲鹿毬場諸蹟皆為樵牧之場惟東西繡嶺
綺石層松尚為登眺佳處浴罷宿泉上公署
即九龍殿故址也

二十六日過灞橋橋旁兩岸皆植楊柳古名銷
魂橋也恨人羈客至此黯然方輿記漢灞橋
在古長安城灞城東二十里南北兩橋以通
新豐道唐灞陵橋在京兆通化門東二十五
里近文帝灞陵橋蓋有二雍大記灞水即古
滋水出藍田谷會渥澹北流入渭渥水輞谷
水也方輿勝覽云秦穆公霸諸侯更滋水為

灞水以彰霸功三輔黃圖云漢文帝因山為
藏就其水名以為陵號故曰灞陵又西渡澹
水地里志澹水出南陵縣之藍田谷西北流
至灞陵入灞水酈注云澹水出京兆田谷北
至灞陵入渭關中八水之二也上長樂坡望
終南遶長安城東北憇北關寄家書京師按
長安舊城有三漢都城在今府西北二十里
名北斗城直子午谷隋于漢故城東南據龍
首川為新都號大興城直石鼈谷唐因之宋
呂汲公大防嘗刻長安圖今西安府治長安

咸寧二縣何仲默以為當在隋唐宮城之間也午後西行經漢武帝通天臺故址望高帝長陵渡豐水注云豐水出豐溪西北流昆明池水注之北入于渭渭水在咸陽城下時秋漲不得度循渭北行六七里始得舟返照初霽亂雲乍歸南望白閣紫閣諸峰紫翠萬狀溪波高冠海諸勝皆在咫尺杜詩錯磨終南翠顛倒白閣影岑詩遙看白閣雲半入紫閣松形容酷肖兩易舟始抵西岸暝色欲來望舟上人歷歷在終南嵐氣中抵咸陽縣

二十七日故人劉戶部介菴

元勳

家居侍養入

城相慰勞久之別去咸陽即周豐鎬秦故都境內帝王將相陵墓最多文武成康周公太公皆葬城北畢郢原上漢長陵安陵平陵渭陵亦在焉高冢纍纍絡繹相望午次興平縣過武帝茂陵縣周懿王所都犬丘地項羽封章邯為雍王亦都之萬曆中耕人得一小印龜紐方寸許文曰雍王章邯印漢武置茂陵縣屬右扶風西三十里馬嵬坡太真葬處在始平原荒落殊甚相傳出白土名貴妃粉唐

降金城公主於吐蕃駐此更號金城

二十八日午次武功縣岡阜四遶城倚雍原城

東有漆水山海經云踰次之山漆水出焉北

流注于渭水經注又謂之武功水也古有釐

氏國后稷始封地漢曰武功地理志云太乙

山古文以為終南垂山古文以為敦物皆在

縣東今太乙屬整屋太白即垂山武功二山屬

郿雍大記云古武功在渭水南今郿縣地則

今之武功乃漢書之釐也記又云永平八年

復自渭水南徙武功縣于故釐城然地理志

郿釐武功并隸右扶風亦所未詳城南有慈

聖寺唐慶善宮即文皇所生之地武功蘇氏

自子卿後代有名人項背相望符秦時道質

第三女蕙嫁扶風竇滔滔鎮襄陽蕙織錦為

迴文詩寄之首尾七千九百五十八首自云

徘徊宛轉自成文章非我佳人莫之能解唐

則天后及宋閨秀朱淑真并記其事黃山谷

詩千詩織就迴文錦如此陽臺暮雨何只有

英靈蘇蕙子更無悔過竇連波明正德間康

德涵罷官居汧東與鄠杜王敬夫競為樂府

至今海內艷稱之康故居在渭河之西故又稱許西云暮抵扶風縣隸鳳翔府扶風岐周故地漢三輔之一漢右扶風領縣二十餘此其一隅耳城東門外漆漳二水合流水南有孤阜曰飛鳳山上有馬伏波及三班曹大家祠今城西有伏波村班家臺城北有織錦巷又東南有絳帳村馬季長傳經處

二十九日過漢伏波將軍墓又過龍尾坡唐鳳翔節度使鄭畋破黃巢于此午次岐山縣岐周故城宇文氏割涇州鶡觚縣地置三龍縣

隍更今名岐山梁山三龍山皆在東北城負其陽山下有周公廟亦曰周邸與太公召公合祭注雍水又東南流與杜水合水出杜陽

山

在鳳翔縣

其水南流謂之杜陽川東南流左會

漆水徐廣曰漆水出杜陽之岐山是也漆水南流大樂水注之即岐水也暮抵鳳翔府治鳳翔縣東坡先生簽判鳳翔日作八觀詩石鼓今在太學詛楚文王右丞吳道子畫皆已不存惟東湖無恙岐州水苦鹹濁獨此水味絕甘美多荷芰修竹爲郡中遊觀之最府署

有東坡九日獨遊開元寺懷子由詩石刻完好和之石鼓山在城東即周宣王所鑿獵碣處也

三十日出鳳翔南郭遙望陳倉山直插天漢與太白終南相連亘秦蜀大阻也渡汧水酈注汧水出弦蒲藪逕汧縣故城非史記秦文公東獵汧田是也又東逕吳山即西鎮古之汧山也又東南逕隄糜縣故城逕郁夷縣又東流入于渭渡金陵河河出五峰山亦東流入渭渭水自渭源來經數百里至陳倉城南其流

始大非會諸水以至咸陽又過古陳寶祠今名祀雞臺城東二里有泉散流山麓曰娑羅泉泉出山巔金臺觀張三丰所居也晡抵寶雞縣秦武公都雍陳倉城即此縣西南彌望連峰疊巘杳然無際咏坡詩非客初來試新險蜀人從此送殘山感嘆久之夜大風寒甚聶七月朔寶雞城南渡渭水何仲默云渭水在渭源縣甚清淺多石子磊磊然至寶郿乃沛然成洪川也又二三里過清澗河水特澄碧棧中煎茶坪以東諸澗之水滙為此河東下

入渭溯清澗而上過益門鎮鎮元平章李思
齊築石壁峭絕往往瀑水成川聲若奔霆一
徑如髮明滅亂峰中入棧之始車怠馬煩五
十里次觀音堂假宿僧舍舍後修竹數十清
泉一泓出石壁下頗足流玩

初二日陰晦過和尚原煎茶坪坪高出衆峰上
俯視四山雲霧如沆瀣一氣皆在足下循山
麓而西稍有平田村聚山南渡大蘭河河流
至階成文禮間爲白水江南至四川昭化縣
與嘉陵江同入閬中次黃牛堡王吳璘以強營

弓退敵處暮抵五星臺宿

初三日晴霽小憩石關即大散關也關下有
大散水又曰故道水史記漢高祖從故道襲雍
敗章邯于陳倉今尚有故道廢縣水西南流
與嘉陵水合西過兩當略陽界出陽平關入
蜀江午次鳳縣相傳周文王時鳳皇集此唐
爲鳳州宋南渡後川陝要害也城排一里豆
積山上有崖閣下臨嘉陵水唐冲妙先生隱
處是日從人買得鸚鵡四

初四日登鳳嶺或曰鸞鷲山晁以道所云得鳳

之三而鳳集之者也嶺直上二十里人馬踏石稜上行始易小輿才十許里風氣寒甚添絮衣山巔有僧閣四眺無所見類子厚所賦囚山也下山十五里過新紅舖兩壁對峙石勢如竒鬼攫人一水自東山來極清駛巨石扼之更作澎湃石梁屢折頗似人家林園午次廢丘暮抵南星鎮

初五日枕上聞急雨淙淙四山草木有聲如甲馬馳驟冒雨即行諸山出雲縷縷石上過古陳倉道即兩當道也度柴關嶺嶺上下二十

里石齒廉利如劍鏑下嶺沿青羊河行河流挾雨益怒巨石怪醜時來壓人幽篁叢木蒙茸數十里不見山巔行人與虎豹蛇虺爭一綫聞其南紫栢山有巖洞七十二為仙真栖止之所次留壩天已暝止宿夜雨稍霽

初六日雨止趨武關以小舟渡入褒城縣界山多猿多鸚鵡自画眉關而下至馬道百里間俗謂二十四馬鞍嶺險峭特絕一嶺上下登頓輒數里上如猱升下如鯨行外俯迅流內倚絕壁石磴連卷其中山骨呈露不受寸土

壽藤古竹鞦韆四垂石壁如厂如突如城如
碣如步欄如堂皇如屠廡竒態殊狀流玩不
給飛泉出石罅奔流千尺與江水鏗鎔相亂
棧中之水大約有四支茶坪以非衆水非流
為清澗河入渭為一支茶坪以南衆水西流
至階州西和成白水江為一支鳳縣以非斜
谷大散嘉陵諸水西流由徽州兩當畧陽成
嘉陵江為一支柴關以南青羊水西南至武
關北褒水從東來注之俗曰黑龍江合流至武關石
溝水從西來注之合流至馬道驛樊水從西

來注之又南合青橋沙河諸水以入漢江其
大較如此西都賦注褒斜谷其水南流蓋未
詳也馬道相傳鄼侯追淮陰至此或云在巴
山或云孤雲山未知孰是客舍後枕江流如
百萬甲馬聲使人悲壯

初七日發馬道渡青橋河食青橋驛再渡沙河

自馬道至此山頑劣少竹至觀音碕舊名閭王碕

漢復易今名竒石插天犀林立飛湍箭激凝為深

淵其色黝黑潭而不流憑高下瞰令人魂悸
有舊碑在道左大書雲棧首險近陝撫賈中

丞煨石開道自此迄寶雞凡木石之工九百
三十八丈有奇又于此劖大石置欄楯行旅
便之余在京師時友人宋荔裳琬作棧道平
歌紀其事語最豪健沈繹堂荃書之時稱二
絕今已陷石嵌絕壁余踏危石奔浪仰視略
見髣髴因賦詩懷二君又二十里至七盤嶺
雞頭關盤旋而上去天尺五孫樵云陟雞幘
之蹇墟下七折之峻阪謂此也此地視鳳嶺
僅及其半然乘高南望梁州沃野川原曠然
褒水近縈漢江遠抱連日行鼠穴中忽如負

青天睹白日心目洞豁按何仲默雍大記云
西南曰褒谷從褒入南曰駱谷從洋入東南
曰斜谷從郿入其棧道有四從成和階文出
者為沓中陰平道鄧艾寇蜀由之從兩當出
者為故道漢高攻陳倉由之從城固洋縣出
者為斜路道武侯屯渭上由之從褒鳳出者
為今雲棧道漢王之南鄭由之余所經歷谷
中驚湍飛棧鳥駭獸逸殊有孫樵之賦不及
詳者其他三道險阨又可想見因憶李供奉
云邇來四萬八千歲不與秦塞通人煙歐陽

四門云秦雖有心蜀雖有情五萬年間負不相接近實錄也下嶺次褒城縣宿褒城古褒國禹封其子爲褒侯都此元微之詩花疑褒女笑棧想武侯征是也褒水出谷流至城東南入漢江酈注褒水又東南歷褒口即褒谷之南口也北口曰斜又南逕褒縣故城東即褒國西南有箕谷鄭子真谷口也

初八日渡褒水循山河堰堰上有漢相祠祀蕭曹二公祠中宋碑一一慶曆二年給事郎守秘書丞知縣事騎都尉竇允撰一乾道五年

左承直郎四川宣撫使司準備差遣閻蒼舒撰書皆仿虞永興圓勁可愛四十里次漢中府治南鄭縣郡本秦惠文王置漢江自西來經城南東流由興安入楚帆檣相望風土物產大約類江廣間多魚稻蓮芡梅桂柑橘棕櫚梔子之屬漢拜將壇有二一在府治一在城南府治者今作太守園圃桂樹皆合抱甘蕉有丈餘者次公水部來時夜雨夢兒渾抱持痛哭而醒聽空階滴瀝聲不復成寐

初九日過次公邸故明瑞王宮也王明神宗子

天啓中與福惠二王同就國李自成入秦王
走重慶張獻忠陷重慶遇害今瓦礫滿目惟
存後殿一區改興元書院前守鍾琇所置也
朱門潭潭尚極宏麗殿前後叢桂老梅櫻桃
數十株又觀所謂西園者有亭榭四五桂花
漸落紫荊數株方作花淒艷動人有羝羊伏
草中驚人而起因憶盛時鶴洲鳧渚之樂而
今臺榭已傾曲池就平不待雍門之琴乃泣
下矣

初十日發漢中府沿漢江北岸而西復涉褒水
其南直中梁山不半里即褒水入漢處飯長
寨虛谷菴菴有黃楊二樹交柯攢葉一本萬
殊高出簷霤亦奇觀也晡抵黃沙驛水經漢
水又東黃沙水左注之酈注水北出遠山山
谷邃嶮谿曰五丈谿水側有黃沙屯武侯所
開也其水南注漢水南有女郎山山上直路
下出不生草木世人謂之女郎道下有女郎
廟俗傳是張魯女有小水北流入漢謂之女
郎水自南鄭至此七十里間水田漠漠穠稔
萬頃畝可十鍾古稱天漢不虛爾

十一日次沔縣古白馬氏東境漢武都郡之沮
縣梁武興蕃王國也水經沔水又東逕沔陽
故城南又東逕西樂城北注于漢按禹貢嶓
冢導漾東流為漢孔安國曰漾水東流為沔
酈注云至漢中為漢水是互相通稱也縣南
枕沔江渡江東南十里即定軍山漢昭烈帝
始為漢中王設壇沔陽即此丞相諸葛忠武
侯墓在山下東北向史謂遺命因山為墳冢
足容棺者也墓前有祠遺像儼然漢後皇帝
景耀五年從習隆向充之請詔為丞相立廟

于沔陽墓多枇杷橘柚又青林前有高原土
人稱武侯坪水經注所謂高平武侯宿營處
也有八陣圖石尚存北岸稍西近郭道左有
公祠唐貞元中山南西道節度行軍司馬檢
校尚書刑部員外郎 御史沈迥撰碑尚

存近代彭幸菴澤趙大洲貞吉黃慎軒輝數
碑皆完好可讀祠堂後有琴室石琴傳是公
所御也其北即漢左將軍糜鄉侯馬超墓

十二日微雨出沔縣西門曲折行亂山中沔水
流經其中略如棧道但山庫無林木沔流舒

蜀道驛程記
緩不及袞水湍悍耳西涉沮水水經沮水出
武都沮縣東狼谷中又東南逕沮水戍東南
流注漢曰沮口注云導源南流泉街水注之
出河池縣東南流入沮縣會于沔今二水合
處尚曰沮口暮抵大安驛有土城廢址唐之
三泉縣宋置大安軍城東一水自西北來南
注沔江曰三泉有泉三大如車輪縣得名以
此大安又有龍門山潭毒關諸蹟陸放翁有
遊三泉龍門及遊潭毒關羅漢院詩關即宋
劉子羽築壁壘拒金人處放翁又有自三泉

泛舟至益昌詩

今四川保寧府昭化縣

今沔沮之間闊者

未丈許狹者才二三尺沙石磷磷深不沒踝
不可行舟惟略陽至陽平關舟楫可通廣元
昭化去三泉尚六十里

十三日雨三十里小憩寬川舖自大安西南亂
山益稠至金牛驛北望見嶓冢山峩然雲表
一小水自西東流即所謂嶓冢導漾者也水
纔濫觴不沒鳧雁合五丁峽水東流為沔其
流始大金牛驛西三里有路通陽平關稍南
入五丁峽一名金牛峽舊傳蜀王遣五丁力

士所開秦因以滅蜀薛文清公云蜀在禹貢
為華陽黑水梁州之域其通道中國久矣世
傳惠王以金牛詐蜀使五丁開此峽繆安不
稽峽口懸崖萬仞陰風颯然入峽即奔峭四
合猿鳥磧絕水自峽中噴薄而出人馬從水
中行惡石如蠻象擗龍伏水中時時齧人自
峽口至五丁關十五里步步懸絙而上下峽
亦如之則偃僂循牆而走矣傳稱此峽為蜀
道第一險信然雨次寧羗州州在亂山中無
城堞本沔縣羊鹿坪地則洪武中以山寇作

亂置衛于此成化中即衛建州治明末流寇
小紅狼據之又經獻賊之亂城郭為墟宿北
關在州城隔河入夜雨不止

十四日冒雨發寧羗行十里河水大上不得渡
解鞍待渡道旁田家其人張姓自言荊州人
幼為張獻忠掠入蜀屬其僞前軍都督李定
國非寇漢中居數日李自成部將賀珍自京
師敗潰走棧道以爭漢中定國棄城遁時獻
賊軍至廣元聞敗發怒遂歸成都屠之下今
蜀諸郡屠戮無遺獻忠自統大軍駐順慶之

西充謀走湖廣時 肅王大兵已入蜀偵者
以報賊輒殺之凡殺數人無敢復言者已而
天兵奄至其部下劉進忠先降為鄉導遂射
殺獻忠云午後水稍落乃行時洄水怒漲取
道大崖巨石斬斫仄徑不容跬步下臨奔湍
數十丈皆下馬捫壁彳亍而過人面如土過
百牢關關隋置初名白馬關以黎陽有白馬
關改今名孫樵云越百牢而南指憇石門之
委邃也下有分水嶺嶺東水皆北流至五丁
峽北合漾水入沔嶺西水皆南流逕七盤關

龍洞合嘉陵水為川江按常璩云漢水有二
源東源出武都氐道縣漾山因名漾西源出
隴西嶓冢山會白水經葭萌入漢始源曰沔
故曰沔漢酈注引漢中記云嶓冢以東水皆
東流嶓冢以西水皆西流即其地勢源流所
歸故俗以嶓冢為分水嶺即此推沔水無西
入之理又云東西兩川俱出嶓冢而同為漢
水孔安國曰泉始出為漾而常璩專為漾山
漾水當是附會為殊目矣按常氏以沔為西
漢水其說紕謬酈注辨之韙矣又謂東西同

出蟠冢殊未明白且桑欽謂漾水出隴西氏道蟠冢山東至武都沮縣為漢水而曰至廣魏與白水合又至葭萌縣與羗水合是以漾為西漢水也又謂沔水出武都沮縣東狼谷中又曰沔水東南逕沮水戍東南流注漢是以沔為東漢水也酈氏兩疏之而未辯其非夫禹貢蟠冢導漾東流為漢漾之東流見于經者顯然如此余過武都蟠冢山下詢漾水土人指涓涓細流東南入沔者即是則漾入沔合流而東共為東漢水其源流甚明而其

上流又出分水嶺以東之水穿五丁峽而與漾合常氏既附會漾山之名以為東漢又妄以沔出蟠冢合白水為西漢是明與蟠冢導漾之文相悖桑氏又析漾沔為二條其流迥別至云漾合白水羗水則與禹貢東流為漢之文亦不符合今按通典蟠冢山有二一在天水上邽一在漢中金牛山雍大記云西漢水在西和縣源出蟠冢山西流與馬池水合此乃上邽之蟠冢在今秦州又云漢江源出沔縣蟠冢山東流入金州此乃金牛

即五丁峽之

嶓冢禹貢嶓冢導漾乃沔縣之嶓冢非秦州
之嶓冢知嶓冢有二則東西二漢源流各自
了然漾之與沔本為一流與隴西之嶓冢都
無交涉常氏之誤可不辨而明矣沮水出武
都東狼谷東南流注漢水經此條在沔水下
而此又云漾水出隴西嶓冢山東至武都沮
縣為漢水不惟兩漢水皆合于沮必無是理
而漾水近在武都之嶓冢反遠引隴西之嶓
冢東流至武都為漢其誤總在以兩嶓冢為
一山故自為矛盾如是酈氏于漾水條下又

云通谷水出東北通溪上承漾水西南流為
西漢水則未嘗按脉察理而牽合桑氏之說
以成其誤不知漾水實東南流無由西南流
與嘉陵白水相合也山海經云嶓冢之山漢
水出焉東南流注于沔郭璞云在武都氏道
縣南蘇氏書傳云漢始出為漾東南流為沔
至漢中東行為漢皆謂東漢水耳其嘉陵江
自兩當略陽出陽平關至朝天峽南逕廣元
縣又南逕昭化縣白水江自階文來入之酈
氏所稱西漢水南入嘉陵道而為嘉陵水常

氏所稱會白水經葭萌桑氏所稱至廣魏與
白水合又至葭萌與羗水合者皆此水也黃
氏日抄云漢水二源一出秦州天水縣謂之
西漢水至恭州巴中縣入江今重慶府巴縣一出大安
軍三泉縣謂之東漢水至漢陽軍入江觀此
則二漢水源流了然矣二鼓抵黃壩驛是日
冒雨涉水四十餘次夜聞呼譟聲詢之云麋
多食稼農夫野宿驅之故耳

十五日雨過七盤關入四川保寧府廣元縣界
次神宣驛上龍洞背兩山夾峙一山如獐龍

奮脊橫跨兩山之間下有洞似重城門可通
九軌水流其中下視煙霧蒼鬱不測尋丈自
是盤折而上騎龍背行四望諸山如劍鏃戟
牙二十里許始下山渡河即分水嶺以西水
入嘉陵江處南山之巔爲朝天關孫樵所謂
朝天雙峙以虧蔽中慘慄而陰翳是也其下
江岸小有聚落止宿明日登舟

十六日夜大風晨稍霽入舟遣從騎山行舟中
寬首尾狹竹箬覆之僅蔽風雨左右用槳六
枝不施桅篷製如江浙之梭船川人呼爲板

船過朝天峽兩峽各高數十丈削立如關門
石壁上有巨洞云是獻賊所鑿可容萬夫壁
下近水多石孔昔人緣崖架棧于此三十里
一山秀拔石如劍劈上有飛仙閣江平舟駛
未午次廣元縣蜀王弟葭萌所封古苴隸國
華陽志曰晉壽縣劉氏更曰漢壽蜀檮杌曰
利州四會五達之地是也昭烈使陳式絕馬
鳴閣道即此朝天峽上有武侯籌筆驛孫樵
云眇山川以懷古得籌筆于途說指前峰之
孤秀傳卧龍之餘烈城西二里有烏奴山陸

游詩暮雪烏奴停醉帽秋風白帝放歸船者
也午微雨晡晴抵昭化縣亦古葭萌地南宋
益昌漢大將軍費禕里也唐書何易于爲益
昌令刺史崔朴乘春泛舟東下出益昌索民
挽舟易于腰笏挽舟上下刺史驚問狀易于
曰方春百姓不耕即蠶隙不可奪易于爲屬
今當其無事可以充役刺史慙跳出舟騎還
去今縣令中未知尚有如此人否廣元益昌
皆瀕嘉陵江自寧羗至此荒殘凋瘵之狀不
忍覩聞近有

旨招集流移寬其徭賦募民入蜀者得拜官數年
之後當有起色是在大吏與良有司耳近昭
化里許即桔栢渡白水江自北來與嘉陵江
合水色澄碧二水合處清濁劃然水經西漢
水東南至廣魏白水縣西又東南至葭萌縣
東北與羗水合注白水又東南逕吐費城南
即西晉壽之東北也東南流注漢水入夜月
色皎然江聲激壯舟人作渝歌與柝聲斷續
中夕不能成寐

廿七日五更早發江平無風過魚尖子算錢石

箭憶期歸期上下三岐諸灘一水自劍州來
會次虎跳驛暫泊午後過長洋灘東灘竹灘
樓門灘香溪蒜渡鴛溪口鴛溪口亭子口亭
子夾岸民居數百家有良田沃野暮抵雙漩
子泊舟見月夜聞笛聲甚淒婉五更大風雨
十八日雨中過葡萄碓燒雞灘水觀音塔子山
次蒼溪縣漢昌地古賓國也有賓城盧城
華陽國志漢昌縣和帝時置縣城在嘉陵東
岸江水西南流其東離堆山有顏魯公記午
後過新開灘朱公子白崖子石羊寺瓦子灘

蜀道馬和言
西門灘抵保寧府治閬中縣東北過靈山昔
蜀王鼈靈登此又有玉臺觀滕王亭子皆唐
滕王元嬰遺蹟泊舟城南閬中山下山一名
錦屏名山志云閬中山多仙聖游集從舟中
望之正似培塿雜樹籃髮如老翁顛髮無巖
壑雲物之美定浪得名耳山上舊有少陵祠
堂遙望山半一亭蕪陋甚無樓觀臺榭蓋亂
後廢久矣江間多磴船如水車之製泊急溜
中礧礧舂簌悉用水功軋鴉之聲不絕入城
宿使院夜見螢火

十九日晴闌去成都六百餘里尚隔十一驛需
次公至約同行憶去秋在京師沈繹堂侍講
以箋索書予爲書陸務觀閬中詩云殘年作
客遍天涯下馬郵亭便似家三疊淒涼渭城
曲數枝閒澹閬中花擘牋授管相逢晚理髻
薰衣一笑譁俱是邯鄲枕中夢墜鞭不用憶
京華是時予與繹堂輩方日爲文字之飲既
書此詩意頗不懌今日到閬州始省前事豈
前定耶閬中人民城郭在川西北諸郡差爲
完好當全蜀用兵時此郡駐督撫藩臬及諸

鎮十餘皆披草萊以居數年來諸司始還成
都薄暮次公至

二十日巡行牆柱間見膠州宋童子世勳題壁
大字方圓徑寸勢甚飛動東粵方伯艾石幼
子在華陰見之未及羈貫艾石子婦姜字淑
齋亦工撫晉人書京師士夫得其紈素便面
多珍秘焉午後陸行人至

二十一日出南門渡江登南岸四眺羣山廻合
志云閩江迂曲三面環之故曰閩中也遶出
錦屏山背西南行四十里抵龍山驛四無人

居雨甚

二十二日雨盡日行亂山中渡小河其水自梓
潼劍州來南流入嘉陵江小憇香潭子南部
縣界縣古南充國地土人云自獻賊亂後惟
南部蠶桑絲枲之利甲于川井又言西南舍
許即宋陳文忠堯叟兄弟故居至今稱狀元
里雨行六十里抵柳邊驛

二十三日柳邊驛西南頗見稻塍雨行四十里
次天馬山富村驛楊文忠詩才到富村風景
別竹林松徑是人家今豺虎窟穴耳窓外即

蜀道驛程詩
荒山蟲聲四起夜不成寐

二十四日五更雨行把炬亂山中上霧下潦衣
袴盡濕午次鹽亭縣鹽亭漢廣漢地季漢分
置梓潼晉置宕渠梁易今名縣東北里許石
壁竒峭俯臨一溪曰瀾水溪東爲孱亭山水
自閬州來逕城東南合梓潼水水源出劍州
陰平廢縣歷梓潼縣至鹽亭城南雲溪水出
城西來與之合三水同流入涪江酈注孱水
出孱山歷孱亭下注涪水者也又鷲溪在城
北亦流入涪溪土人家以絹爲業堅潔異他

處文與可詩所云鷲溪也杜詩雲溪花淡
淡春郭水泠泠全蜀多名士嚴家聚德星縣
有德星春郭二橋以此縣城堞已毀居民尚
數百家冒雨出南門渡梓潼江緣光祿山行
即杜光祿坂詩所謂山行落日下絕壁者也
又三十里登蟾毒山險惡殊甚雨中望四山
林木鬢髮暝色漸合令人心悸下山行十五
里次秋林驛在深箐中目前種種如地獄變
相恐復非吳生畫筆可辨人家十餘結茅竹
在箐中土人云蛇虎雖多與人無害夜雨甚

二十五日冒雨行又十五里始出箐中稍晴午
憇高山舖山峻絕砌石為階級登頓稍易午
渡涪江江發源吐蕃入塞經松威諸州由縣
州至潼川南合中江下合州與嘉陵江合酈
注稱涪水出廣漢屬國剛氏游徼外東南流
涇涪縣西水經又云南至小廣魏與梓潼合
梓潼水自鹽亭縣下馬河來會水經云梓潼
水出其縣北界西南入于涪注稱先主嘉霍
峻守葭萌之功分廣漢以北別為梓潼郡以
峻為守有五婦山馳水所出亦曰潼水自縣

西涇涪城東又南入于涪水謂之五婦水口
也里許次潼川州漢置廣漢郡及郫縣西魏
改潼川郡隋為梓州唐至德中置東川節度
使治此今州西有廢涪城縣州東有廢郫縣
孫樵謂涪繚于郫是也子美寓此最久州有
橘亭水亭官閣諸蹟并以杜詩得名唐劉蛻
以拾遺謫寓此作文冢兜率寺中自為銘見
文泉子東山上有蘇泉相傳坡公試茶地曾
有人于泉側掘得小石刻題曰艤峽也

二十六日雨止州西門外跬步即牛頭山杜詩

青山意不盡衮衮上牛頭者也山高不丈許
無巖壑之觀寰宇記謂其四面孤絕樓閣煙
花爲一方勝槩安也上有亭即所謂牛頭山
亭子今廢渡西溪午晴晡抵建寧驛竟日出
沒荒草中土人云地多虎日高結伴始敢行
二十七日微雨自潼川西來山險稍平然泥淖
特甚人馬多蹶彌望百里田在草間午後次
中江縣本漢五城隋曰元武宋易今名銅官
山鄴江所出或謂即漢文帝賜鄧通冶鑄處
華陽志謂在臨邛于事實爲近元武山在縣

東南南江東江合流其下爲中江流入射洪
遂寧與涪江會下合州與嘉陵江會常璩云
五城縣有水通於巴漢時置五倉後因以爲
縣宋蘇學士易簡里也縣頽廢甚于潼川境
內人戶纔三十餘家驛中有膠州閩秀姜氏
題詩云清泉石上溜松風薄受霜華葉乍紅
曲路通邨知近遠一條竹杖萬山中字仿褚

河南

二十八日雨西門渡江即登天柱山盤折而上
二十里路峻泥滑徒旅鮮不顛踣至雲津橋

雖蕪沒叢筍規製尚極宏麗夾路巨竹成林
惜其荒翳蒼蔚無復本色過走馬坡山執稍
平然草樹陰晦上不見日與五丁蟾毒相似
下連山渡河野宿漢州界自閏七月朔入棧
時逾旬月途歷二千至此始出山杜詩連山
西南斷始見千里豁信爲實錄夜大雨

二十九日自連山泥行二十五里渡河曰沱江
次漢州自連山至此凡三水皆自灌口來源
同派別共入金堂界下合涪江禹貢岷山導
江東流爲沱是也華陽國志李冰壅江作壩

穿郫江檢江別支流過郡下溉灌三郡開稻
田沃野千里號爲陸海又導洛通山洛水出
灤口經什邡郫別江會新都大渡即此水經
云洛水自三危山東過廣漢洛縣南注云洛
水出洛縣漳山亦言出梓潼縣栢山逕什邡
縣又南逕洛縣故城南廣漢郡治今江岸有
斷碑書連山沱水四大字州城北枕沱水即
漢廣漢郡治雒縣常璩志稱本治繩鄉元初
二年移涪後治雒城與蜀郡犍爲爲三蜀唐
房琯以宰相貶此州鑿西湖名房公湖漢故

一都會城中石表咫尺相望想見盛時而城堞室廬鞠爲茂草矣

八月初一日晴發漢州渡河凡三皆以竹棧川流迅激殊有戒心酈注洛水又南逕新都縣與縣水合水西出縣竹縣又與湔水合亦謂之郫江午過彌牟鎮觀武侯八陣圖惟一殘碣立道左草木荒翳不能通人陸務觀有彌牟八陣原武侯祠堂詩補次新都縣使院爲楊用修先生故居稍東即文忠公第從蔓草中多見柱礎遺跡院內兩桂樹婆娑無復生

意昔許文休寓書曹氏自述流宕漂薄之苦虞仲翔沒齒南海至欲以青蠅爲弔客讀其詞未嘗不嗚咽用修父子遭際明時得君行道文章氣節冠冕士林乃至批逆鱗觸雷霆一謫南裔長往不返觀其七十行戍稿可爲扼腕流涕也用修夫人黃亦有才情世所傳寄外詩曰歸曰歸愁歲暮其雨其雨怨朝陽二語乃山谷句夫人豈竊之耶夜晴列星粲然自入棧一月來未覩此矣

初二日晴憇新都縣有唐僖宗行殿遺址石礎

尚存新都又名新鄴地里志汝南亦有新鄴
後漢改曰鄴丘

初三日發新都過昇仙橋司馬相如題柱處午
抵成都府

蜀道驛程記卷上

